

摘藻堂四庫全書薈要

集部

欽定四庫全書薈要卷二萬五百三十九

集部

明詩綜卷六十六

翰林院檢討朱彝尊編

錢士升一首

士升字抑之嘉善人萬曆丙辰賜進士第一累
官太子太保文淵閣大學士

靜志居詩話相君晚達爰立未久旋
遂初衣薦丁亂離故其詩多鬱轡

南園即事

世情不到處獨寤寐歌時但有雲山入兼無樵牧知竹
光虛牖白花氣雜林遲不覺斜陽下鄰家起晚炊

劉榮嗣 三首

榮嗣字敬仲周人萬厯丙辰進士除戶部主
事調吏部歷郎中累官至工部尚書總督河道

有半舫集

詩話尚書銜命治河時駱馬湖潰運道填淤乃
創挽河之議起宿遷至徐州別鑿新河分黃水
注其中以通漕運計二百餘里費金錢五十萬
邳州上下悉河流故道濬之尺許皆沙掘之為

河經宿沙落河坎復平迨引黃水入波流迅急
銜沙而下往往成淤明年漕艘至駱馬河潰流
適平運丁惟願入泐不願由新河尚書雖躬督
之諭以軍法間有入新河者舟輒膠於是南給
事中曾景參上疏特糾落職提問下獄論辟獄
未解而卒朝野之論以尚書河渠之任本非所
長皆誤信門客之說用違其才為可痛惜其後
駱馬湖復潰舟行新河人頗稱便馬至其詩格
早早未能遠
與古人方駕

白石莊萬都尉園作

仙圃宜秋色相將戀夕曛青松新濯雨槐古舊侵雲竹
牖池光合山樓石翠分鳳簫遺韻在擬向月中聞

題畫 二首

老去登臨怯杖藤，好山不上最高層。
疎松幾樹斜陽裏，閒看巖前掃葉僧。

灌木陰陰溪水斜，溪頭鷗鷺浴晴沙。
春潮退後風生急，魚網船梢挂落花。

彭汝楠 一首

汝楠字伯棟，莆田人。萬曆丙辰進士，除會稽知縣，入為禮科給事中，累官兵部左侍郎，贈尚書。

讀黃維章辯疏有感

聞道櫓槍未掩芒驚聞龍戰又玄黃赤眉豈遂移炎漢
白馬還宜鑒李唐君子獨為洵足恥黨人不與亦何妨
聖明自是如天宥黽勉同心定我王

潘曾紘 二首

曾紘字昭度烏程人萬歷丙辰進士歷官僉都
御史巡撫南贛崇禎中提兵入衛卒于軍有芳

孫館遺橐

大柳驛守歲

古驛逢梅發荒邨帶柳斜
雪明難入夜山霽易蒸霞
碧篆消燈暈黃沙拂劍花
男兒應有氣可復負年華

金陵感遇

花發垂垂歸興濃
便教歸去若為容
日邊潮合迷前浦
雨後烟開出數峰
楊柳暗彫江岸笛
松楸靜落寺樓鐘
閭閻三月音書斷
夢入燕關第幾重

申紹芳一首

紹芳字維烈長洲人萬曆丙辰進士初任應天府學教授遷南京國子助教升禮部主事歷郎中調吏部出為山東按察副使累官戶部右侍郎

送張玉筍中丞進擢總河

玄圭初錫自宸衷四載勤勞特借公開府夙推真使相
導河新命少司空舳艫風引桃花浪海甸雲興瓠子宮
何獨甘棠思召伯轉輸專倚鄼侯功

方大任 三首

大任字玉成一字逢吉桐城人萬曆丙辰進士
除元城知縣擢廣西道御史天啓末魏璫營生
壙僭侈踰制特疏糾之削籍崇禎初補官升僉
都御史巡山海關尋以副都御史撫順天有霞
起樓詩草

詠懷 三首

束髮慕竒癖讀書萬卷餘游思緬邈場削跡焚華塗舉

世爭捷徑欣然笑其愚稟氣固已然改轍將焉如孔生
恥溝壑原子安桑樞素志亮有託斯人豈盡迂掩耳謝
時賢一心抱區區

徘徊芳塘上微風扇輕波連岡蔭青松仄徑冒綠莎是
時秋正深杭稻蕃陂陀腰鎌朝出隴捆載夕歸家烏雀
啄場圃牛羊散巖阿曰余無立錐鼓腹行謳歌拾穗甌
窶間一飽不願多嗟彼攘攘子鼎食終如何

孔雀游赤霄牛角何由觸麒麟可繫羈翻為犬羊辱伊

余類窮猿投林不擇木悠悠長傍人顧影傷局趣百鍊
忤時好繞指乖素欲犁鉏儻可給誓息西山麓

方孔炤 四首

孔炤字潛夫桐城人萬曆丙辰進士除嘉定州
知州調福寧州入為兵部員外歷郎中魏忠賢
欲兄子良卿為伯執不覆削籍歸崇禎初起尚
寶卿以副都御史巡撫湖廣忤楊嗣昌坐兵敗
繫獄嗣昌死屯撫河北卒門人私謚貞述先生

新設屯田

廟議既不與屯田徒有名河北山東地水利難與爭當
先布賞格有司乃奉行隱覈召民種亦須三年成吁嗟
恐不及不如先議兵兵既不如議田亦何由耕

密議歎

楚人歌秦人舞櫓櫓衣傳兩杖鼓殿上伏機多危語密
議知與外廷忤外廷不知乃連章以為朋黨飛嚴霜

謁方正學先生祠

鍾陵松柏對蒼蒼近代南山祀太常寧可紙灰埋十族
不將銘志屬三楊髡緇江上人何在縞素軍前獨發喪
斷事只今依俎豆吾家書種託門牆

先五世祖諱法中
洪武應天己卯出

正學先生門為四川斷事聞
靖難投江今補祀表忠祠

和客傳言

多選中涓辦隊裝明光甲片日爭光原來第一安邊策
只在新開內教場

張 瑋 二首

瑋字韋玉武進人萬曆己未進士除戶部主事
歷兵部郎中出為廣東僉事仕至都察院協理
院事左副都御史卒謚清惠有如此齋集

江行宿淺灘

千里江流此一灣暮潮落盡柁師閒
脩脩蒼荻鳴疎雨隱隱玄雲列遠山
波靜自知憑岸穩官慵肯厭客塗艱
朝來宴起迎新旭秋月秋風興不慳

嘿思仲先約過詹所茶山園以事不偕
小詩代訊

金史卷之六十六
卷六十六
一徑寒雲似練開
茶烟起處小車來
獨憐久病閒雙屐
不踏孤山十畝苔

萬燦一首

燦字闇夫新建人萬歷丙辰進士除刑部主事
調工部歷屯田郎中首劾魏忠賢廷杖流血死
贈太常少卿追謚忠貞

詩話天啓中忤魏璫慘死者先後一十七人萬
公首受其禍公初任營繕主事轉屯田郎先管
寶源局而陵工其職掌也因內官監廢銅不發
疏言其姦謂忠賢珠玉盈筭金銀滿屋何欲不

遂顧此廢爛銅器無足入其目而必一手握定者其設心以為不若是無以操天下之利權既操天下之利權不難攬天下之政權臣有以窺其微矣疏入矯旨於午門杖一百奄人數十輩蠹擁牽衣捽髮而前杖後伏小璫於闕下搥擊錐刺踰四日而殞李忠毅上言曰燼死矣未報國恩先填溝壑六尺之孤繞膝八旬之母倚閭旅櫬無歸游魂戀闕臣僚飲泣道路咨嗟然共知非出於陛下之心也臣不暇為燼冤為陛下冤捐好生之德負殺諫臣之名豈所以作忠勸士哉夫人臣絀口以待遷厚利也危言以招殺實禍也身死而天下悲其忠虛名也舍保身家榮妻子之計博此虛名飢不可食寒不可衣將焉用之况乎傷殘父母之遺體以從龍比於九京人非僕隸法非訊囚罪至死刑命非草芥廷杖之舉殊失士心直俟公論明而卹死錄孤嗟

何及矣被旨以瀆擾詰責蓋自公死忠賢知外廷之無奈彼何由是鈞黨之獄興而縉紳之禍烈矣

登黃鶴樓

我欲乘黃鶴飄然物外游
檻前懷古淚且為禰衡收

魏大中 二首

大中字孔時嘉善人萬曆丙辰進士授行人歷官吏科都給事中死奄禍贈太常寺卿謚忠節

有藏密齋集

詩話忠節骨鯁之臣然頗留心風雅里人王屋
布衣能詩公見其賦秋蘭作為之擊節值文會
公曰孰為賦秋蘭者起而復揖之布衣感公
之知公被逮日徒步送之境外揮淚而別

良鄉縣

彰義門西路桑乾古渡分長羈乘傳馬不斷出關軍沙
白迷荒戍城黃壓暮雲車牛徵到骨募派底紛紛

息游

一夜秋聲萬木寒乾坤何處足彈冠時名盡向黃金起
世事都堪白眼看已自故人嗟落魄更誰同病問加餐

風塵伏枕衡門穩行路於今轉覺難

陳熙昌 一首

熙昌字

闕

南海人萬曆丙辰進士除平湖知

縣擢吏科給事中

東湖雜詩

乍浦瀛壖曲遙連蘆瀝場迎船桑葉白繫纜菜花黃塔
影開初地鐘聲落上方孤城非鐵甕先事慎隄防

詩話乍浦孤城如彈丸倭寇入犯之衝經國者
不置重兵於其地綢繆牖戶之謂何陳公作宰

在太平之日先有隱憂矣予嘗過其地登湯山
山舊有塔寺僧持疏募重建子亟語縣令已之
蓋洋船望見塔易指點入
口之路不可不深慮也

朱泰禎

一首

泰禎字道子海鹽人萬曆丙辰進士除龍巖知
縣調漳浦選授福建道御史巡按雲南有遠人

樓詩集

睡鴨

綠萍埽罷柳梢齊
疎雨斜陽思轉迷
此際池塘眠正穩

風花吹夢過橋西

曹守勲 一首

守勲字熙載新蔡人萬曆丙辰進士知曹縣考授浙江道御史出為陝西按察僉事歷陝西副使

題韓淮陰釣臺

城陰片石俯淮流
想象王孫此釣遊
若問將臺何處所
未央宮殿總荒丘

李應昇 一首

應昇字仲達江陰人萬曆丙辰進士除南康推官擢福建道御史死奄禍贈太僕寺卿謚忠毅

有落落齋集

詩話王紹徽撰東林點將錄阮大鍼名亦與焉大鍼初與李忠毅魏忠節相善及忠節補吏垣大鍼疑忠節有意逐之遂結傅榭黨於魏監忠毅猶憶舊交貽之書云昔正叔子瞻一生樹敵到底同鷓鴣藉之名若使蔡確之徒欲分收一人以去二君子必不願也可和可爭必不受小人之攀援斯君子之品乃見而大鍼既投璫幕者已絕於諸君子矣及忠毅被逮於檻車賦詩

云細數知交在道遙各一方魏齊方睥阮籍
亦猖狂形影悲相弔音書夢已荒古人不可作
搔首問蒼蒼抑何其忠厚之深也魏齊指常熱
魏浣初阮籍則指大鉞其後居南京諸生顧杲
等一百四十人草檄討之既而附馬士英得志
導之重翻三案誅鉏正人僉壬之反覆真同鬼
蜮雖有詠懷堂詩
吾不屑錄之也已

哭季弟

憶爾迎還懼悲歌分外深
逐臣生死日歸老弟兄心
慷慨歌聲發飛揚酒力任
呼盧狂竟夕清夢到而今

黃尊素一首

尊素字真長餘姚人萬曆丙辰進士除寧國推
官擢山東道御史削籍被逮死詔獄贈太僕寺

卿追謚忠端有集

楊維斗云先生愴慨
孤直詩篇激而不傷

詩話忠端以考選入都時門戶紛爭多以挺擊
紅丸移官三案占人向背客問公以三案如何
法擇公曰先宗棄羣臣久今上御極亦非一日
三案皆往事恐朝廷所急不在此案無以難也
又曰上未登極之先移官為是御極之後安選
侍為是二者祇爭先後不分是非斯皆持平之
論惟公之立朝不亢不阿專事補救令楊魏二
公從之禍豈若是其酷乎崇禎初死奄禍諸臣
止謚及高楊魏周四公論者多咎姚文毅之過
刻公與萬左袁顧學李及三周公久而易名謚

法守禮執義曰端君子以為宜文文肅作神道碑銘云於惟黃公愛來無方惕號同志戒其用剛蓋得其實也

春日早行

抗旌經古道暝色未全分
漸隱林間月微生海際雲
輕陰開積翠細草落青芬
誰破曠曠曉鳴禽客底聞

黃承昊 四首

承昊字履素秀水人萬歷丙辰進士除大理寺評事選吏科給事中歷刑戶工三科左右給事

出為河南按察副使加參政轉福建按察使有

閻齋吟橐

陳仲醇云閻齋詩高華而不傷氣幽微而不損神流便而不降格

李君

實云閻齋風華婉麗詩品在開元大厯間

閒居夜雨 二首

夜半瀟瀟竹輕寒枕上侵明朝無別事風雨不關心
多少閒花草朝朝抱甕忙園丁今夜睡晏起亦何妨
過長溝見蜀山湖荷花沿堤二十里有作

雲山渺渺水悠悠香滿長堤物外秋只少若邪溪上女

乘潮一弄采蓮舟

塞上曲

鄉月多情伴我來沙場相對不勝哀
明朝生死知何處
且解征袍醉一回

袁中道 五首

中道字小修公安人萬曆丙辰進士授徽州府
教授遷國子博士升南京禮部主事歷郎中有

珂雪齋集

詩話小修才選中

郎而過於伯氏

述別為丘長孺

哀哀一孤鴻飛急向東邁傷哉金石交三載乃相會相
會能幾何一見不復雙子尚滯西陵我遂往鑿江鑿江
不忍別復有攝山行攝山不忍別遂子至冶城冶城不
忍別十日淹江頭飲子清泠酒卧子木蘭舟酸心一夜
風舉目三千路別矣可奈何含淚入城去

郢中送春曲

總以堂堂去何容
緩緩歸隔溪鶯
對語掠水燕雙飛
野草香沾屐
修篁翠濕衣
山花一樹好
游女摘來稀

九日登中郎沙市宅上三層樓

滿眼傷心處
誰能上此樓
林烟迷蜀道
帆影識吳舟
硯北人何在
江南草又秋
茱萸空到手
欲插淚先流

七夕同彭長卿中郎

清談閒送可憐宵
竹戶斜通宛轉橋
白水青林秋澹澹
好風涼月夜蕭蕭
貧來野客傷時序
老去詩人怨寂寥

驚鳥不鳴更漏靜如聞銀浦弄輕潮

投贈太保蹇令公

三朝元老帝長城胸貯雄邊百萬兵
太尉領軍陪漢相上公分陝護周京
卿雲不散投戈色夜雨猶聞洗甲聲
白袷青編無一事蕭然還是舊書生

彭汝諧 二首

汝諧字原樂吳縣人萬曆丙辰進士有蔚菴逸
草

游桃源澗

碧澗山隈轉鳴泉樹杪懸桑麻緣屋宇雞犬隔人烟客
避中峰雨僧安一宿禪桃花今又放相問世何年

從鄧尉山中還至虎山橋坐月

平林漠漠烟光齊花氣霏霏醉欲迷欸乃湖中小舟小
蒼黃日下西山西寒鴉飛盡渚涯闊白紵歌殘月影低
露冷霑衣萬籟靜伊啞邨落催晨雞

沈德符八首

德符字虎臣一字景倩秀水人萬曆戊午舉人

有清權堂集

陸叔度云先生詩發端必密疊韻不匱不踐王李之迹亦不操王李

之戈前無津筏之求後無瑕玷之慮蓋風人之流與朱雲子云虎臣大家然有流宕之句詩

雖不必拘拘漢魏盛唐而臨藉之與淺俗渾雅之與摘鄙不可不辨也

詩話孝廉生稟異質日讀一寸書所撰萬曆野獲編事有左證論無偏黨明代野史未有過焉者其詩寧取公安竟陵欲盡反歷下瑯琊之弊故多豔字側辭雪颯星碎未免病於才多也

秋暮咏懷

百歲電泡爾疇不慕長年究竟命制之脩短非我權玉

局出從地玉棺墮自天大丹紫汞鍊神鼎白石煎尅日
飛舉人不久歸重泉信哉服食誤以藥求神仙

人日

挑菜傳人日山邨樸未知雪深添酒券風橫緩燈期歲
事因貧略春光遇閏遲梅園縱深閉宜賞寂寥時

送李元白都運之揚州

度支聖世借前籌誰似江淮地望優宰相杜悰充轉運
司徒王導領揚州軍需西北勞臣勩民力東南國士憂

餽饋古來功第一進賢何待鄂千秋

苦雨

物候違朝爽山容失夕佳陽烏三舍避黑蟻百靈差故
恣商羊橫先收魃鬼埋屋頽無可漏牆壞不須排廢沼
平多日新堤潰少厓衢高猶嚙屐巷隘或通簿暫步擔
筭遍徒行沒胼皆居如潛島嶼出似泛河淮耳欲生禾
穎塵難屑麥蘗浸畦浮菜甲墮坎沒松釵是埵俱鳴鶴
無坳不產蛙飲泉偏沃蚓升壁但資蝸穴牖呼鄰酒乘

橈覓市鮭炊艱憎浙米薪濕喜枯芟圖史濡難展屏奩
潤易措迂行甘躑躅愁坐廢詠俳護築宵加版存扉晝
瑾柴其魚興浩歎乃粒軫孤懷議禮應雩禱祈晴儻祀
柴何時扇障日利屣上長街

邗城新曲

明月可憐宵曾聽教玉簫佳名二十四第一擣衣橋

天啓宮詞

三首

二廣雙甄陣脚牢御營日麗戰雲高封章臺瑣俱休進

萬乘臨戎正內操

自注唐以左右
神策軍為二廣

歲除舊例幸椒房中尉今宵別上觴
角觝互呈宮漏短
便陳庭燎御明堂

白驪唐代御玄宗陪後將軍始受封
爭似生叨三品料
驪駒賜號小烏龍

鄭士奇一首

士奇字平子嘉興人萬厯戊午舉人署臨安儒
學教諭遷知贛州興國縣以耳聾告歸有松牕

老人橐

釣臺懷古

擇地逃新室披裘對故人
星原占是客帝豈得而臣
瀨急迴潮信壇高費釣緡
不知梅福女偕隱幾冬春

姚希孟 三首

希孟字孟長長洲人萬曆癸未進士改庶吉士
授檢討歷左贊善左諭德出為南京少詹事贈
禮部右侍郎謚文毅有公槐響玉棘門沆瀣秋

旻文遠循滄松癭伽陵風吟等集

陳皇士云先生詩卷容雅

麗有館閣風度

詩話逆案將定思陵發建祠稱頌諸疏申命內閣詳閱限以數日確議來奏輔臣難之求助於文毅文毅中夜不寐周步堂中其客周生進而問公公語之故生曰某於七年中逆知魏客之必敗以詔附諸臣分別其罪自謂無遁情公取而權衡之可乎公覽之擊節稱善次日進於輔臣皆以為當據之入奏生吳江人或曰秀才永年安期或曰永年之弟永言安仁也爰書既定天下咸服凌遲處死者二人擬斬者二十五人充軍者十一人贖徒者一百三十一人冠帶間住者四十四人雖有漏網然吞舟之魚鮮矣

送齊越石守紹興

萬壑爭流處溪山屬剡東
扁舟仍雪夜五馬自春風
官舍朝嵐滿人烟夕照同
蓬萊讓仙吏安坐翠微中

謁景皇帝陵

低回往事未堪陳誰抱遺弓泣紫宸
遙共裕陵今夜月可憐邨邸故園春
朔方老將黃沙苦西市尚書碧血新
陟降在天應不遠蕭蕭松柏卧麒麟

秋感

秋容已到菊花枝
閉戶蕭然誦楚詞
憔悴江籬人不見
滿庭涼月照相思

顧錫疇一首

錫疇字九疇崑山人萬曆己未進士改庶吉士
授檢討天啓中削籍崇禎初以原官起用歷贊
善諭德掌司經局遷國子祭酒假歸補少詹事
起禮部左侍郎升尚書有握日草

詩話建文四年事蹟革除之後文獻俱不足徵
相傳長陵用王景議葬以天子之禮然鍾山之

麓一坏安在祀典無聞則其說妄也其曰葬之
西山既不封不樹矣安得又表曰天下大師之
塔要其說更妄也自弘治中禮部主事楊循吉
首請追謚建文君隆慶初東莞布衣譚清海請
復革除年號告之高廟而追上建文君謚萬曆
中通政使沈子木國子司業王祖嫡禮部尚書
范謙給事中楊天民御史牛應元先後進言得
旨存其年號崇禎中繼以給事中張國維禮部
侍郎呂維祺給事中沈胤培駙馬都尉鞏永固
而褒卹之典久而未舉迨顧公典禮容臺始定
議建文君謚曰嗣天章道誠懿淵恭覲文揚武
克仁篤孝讓皇帝廟號惠宗馬后曰孝愍溫仁
貞哲睿肅閔烈寔天弼聖讓皇后尋追贈死節
諸臣子謚贈太師者文學博士方孝孺魏國公
徐輝祖贈太保者兵部尚書鐵鉉禮部尚書陳
迪刑部尚書暴昭御史大夫練子寧贈太子太

保者禮部侍郎黃觀戶部侍郎卓敬副都御史
茅大方贈刑部尚書者大理少卿胡閔贈詹事
者衛府紀善周是修贈禮部侍郎者翰林修撰
王叔英贈副都御史者浙江按察使王良贈太
常卿者刑科給事中黃鉞贈太僕卿者御史高
翔曾鳳韶蘇州知府姚善贈太僕少卿者知沛
縣事顏伯瑋贈大理少卿者谷府長史劉璟贈
翰林待詔者金川門卒龔翊及伯瑋子有為贈
禮部員外郎者濟陽儒學教諭王省贈平陽伯
者都指揮瞿能贈含山伯者都指揮朱鑑贈指
揮使者燕山衛卒儲福謚文正者方孝孺謚文
貞者黃觀謚文忠者王叔英謚忠襄者鐵鉉謚
忠烈者陳迪胡閔景清謚忠貞者練子寧卓敬
徐輝祖謚忠毅者曾鳳韶王良謚忠獻者黃鉞
謚忠惠者姚善顏伯瑋謚忠愍者茅大方高翔
謚忠義者儲福謚貞毅者周是修謚貞烈者王

省謚剛烈者暴昭謚剛節者劉璟謚襄烈者瞿
能謚壯烈者朱鑑謚安節者龔翊謚孝節者顏
有為以上公論交乎此外得謚者又五十二人
曰節愍齊秦賁子澄張曷盧原質葉福也曰介
愍胡子昭也曰忠愍俞逢辰也曰直愍宋徵也
曰肅愍周璿也曰貞愍鄒瑾譚翼石撰陳思賢
也曰穆愍陳彥回林嘉猷也曰襄愍王度也曰
果愍邊昇葛誠也曰翼愍金有聲也曰莊愍樊
士信張彥方也曰忠莊王彬也曰惠莊向朴也
曰貞莊鄭華也曰毅節林英也曰莊節周季瑜
也曰惠節鄭恕也曰義節唐子清也曰忠節陳
性善也曰忠介程本立也曰莊介韓永也曰忠
毅高巍也曰清毅郭任也曰毅直戴彛魏冕巨
敬也曰端直程通也曰貞直杜竒也曰忠貞侯
泰也曰貞勤謝昇也曰貞確徐子權也曰貞達
盧迴也曰貞穆林右也曰貞定甘霖丁志方也

曰剛烈連極也曰端果龔泰也曰莊景陳繼之
也曰果義黃謙也曰文忠陳忠也其中不無濫
及蓋不能不惑於野史之紀述然如梁田玉史
仲彬輩不與則不可謂顧公無卓識也首陳其
說者萬公元言惟是吾鄉高太常遜志邨典關
焉後之君子覈其實而損益之可矣公致仕入
閩道出温州為悍帥
所殺詩罕流傳云

西湖

臨安宋故都荷花仍十里際曉湖光平鷓鴣鳴不已

侯恪二首

恪字若樸商丘人萬歷丙辰中會試己未殿試

進士出身改庶吉士授檢討削籍崇禎初起右
中允歷諭德庶子出為南國子祭酒有遂園詩

集

詩話侯公以史官秉南董之筆為逆奄所惡晚
又忤烏程移留都洵古之遺直也詩以大雅自
命嘗言詩自三百篇後存亡者三漢魏存矣六
朝亡也唐存矣五代宋元亡也國朝正嘉存矣
今又亡也其持論深惡新體伸北地信陽
而抑嘉靖七子尤痛詆公安竟陵流派云

感時和張叔載

傷心日日賦登樓聽爾哀歌續四愁欲向風塵歸故里

不堪戎馬暗神州
金錢歲入渾難計
鎖鑰朝傳尚有求
辛苦先朝張相國
于今零落楚江秋

送陳集生使南海

鳳闕春深柳乍齊
王孫臺畔草萋萋
看君絳節天南去
驛路晴花送馬蹄

丁乾學一首

乾學字天行宛平人
萬曆己未進士
改庶吉士
除檢討天啓中
落職有擁膝齋集

送劉太史使朝鮮

漢殿遙齋詔一函香爐特許換朝衫
天邊築館迎龍節海上吹鏡遁鸞帆
問俗朱蒙時已改探竒暘谷日應銜
歸來撰得殊方志天外河流海外巖

陳萬言

四首

萬言字居一秀水人萬歷己未進士改庶吉士
有鉞園集

出門

出門澹無營閒步郭北隅四野一何曠仰見秋雲徂微
風動蕭林殘暉息遠墟忽然霞氣新散綺照輕裾高歌
以忘憂薄言返故廬

苦雨

四月靈靈降五月不可遏祝融正司方雨師乃攘奪晴
雲乍卷舒倏忽變陰靄飛瀑寫層簷散絲起跳沫殷殷
雷轟車炏炏電排闥欹枕不成寐但聞鄰語聒晨起問
農事何以曳屨鞞呼童渡郊西為我鼓雙艫推蓬瞰四

野洪水勢方割蛟龍成一氣桑海莽空闊田疇盡淪
槽巢倚木末門吏追逋錢入室尚呼喝枵腹不能對相
向蹙眉頰此意隔九閻圖繪難具達安得沉石犀永使
洪濤闕

逢萌祠

炎精熄中葉閏位爭美新黃龍德有悔賢哲甘沉淪感
茲三綱絕大義疇能伸鴻飛貴先時冥冥謝弋人解冠
挂東都盡室逐海濱同時景明哲亦有梅子真二子不

可作誰其嗣清塵

長夏憩澹止園

辭家謝塵慮結意在巖壑登高畏炎蒸園林寄幽託澄
湖逼遙岑仁智均所樂入徑參茂松環洲雜芳若灌木
挺喬榦踈篁解新籜中有百尺樓凭虛蔭寥廓青山四
壁垂雲氣屢迴薄朝汲葛翁水夕放支公鶴披襟步湖
濱飄風散花萼逃暑蕩蘭棹迎涼啓羅箔清宵寂無人
倚石縱礧礧歸偃北牕隅三五映籬落覽化得沉冥感

遇任離索物理本如此俯仰亦何忤

吳麟瑞二首

麟瑞字思王海鹽人萬曆己未進士除常州推
官徵授南京禮部主事轉吏部進郎中升湖廣
參政歷江西副使按察使右布政使以僉都御
史撫偏沅有哀鴻秋蟀諸集

除夕

歲盡愁無盡殘鐘客思微一官滄海遠萬里白登圍越

鳥栖初定燕雲信轉稀
枕戈空待曉無術報宵衣

長安春興

塵封官柳眼猶迷黃鳥吞聲不肯啼
二月羽書淹塞草十年馬足負香泥
長纓有策終難請短札多愁未易題
忽憶孤山此時節亂堆雪片斷橋西

玄默一首

默字會一靜海人萬曆己未進士除懷慶推官
擢吏科給事中歷戶科都給事升太常少卿以

都御史巡撫河南

泥溝驛

寒雲漠漠月初彎
邨舍無人戶早關
十二樓中愁積雪
不知人在賀蘭山

李吳滋一首

吳滋字如穀吳縣人萬曆己未進士知崇安德
清龍溪三縣遷南刑部主事歷郎中出知寶慶
武昌二府升湖廣按察副使有鳳樓閣詩集

送曹安祖假歸

陶然共事白雲司，幾度追隨笑語時。
年齒偶成一日長，禪心同對十門師。
每分陽羨驚雷羨，迭和青谿踏雪詩。
君去冷曹方是冷，閒居賦就寄無遲。

高道素

九首

道素初名斗光，字明水，一字如晦，更字玄期。嘉興人。萬曆己未進士，除工部主事，歷郎中以督造桂府殿，傾論死。有景玄堂詩集。

陳元孝云：屯田詩俊逸朗。

徹 顧茂倫云先

生五律清真春雅

詩話水部才思兼人，不以格律自拘。古今詩皆超詣五律，尤為長城。當桂藩分建，奉命將作南。方卑濕，薄楹甫新，大璫亟事丹堊。水部力爭，不得。既而雷震柱傾，吏議周內，遂罹顯戮。聞者寃之。

兗州道中寄內

黃沙蔽天氣，白日無晶光。
寒雲何蕭條，四野青茫茫。
驚駭激車輪，我馬亦玄黃。
憶昔出門去，臨別重徬徨。
九月無裳衣，五月無糗糧。
酸辛各自愛，努力願相望。
悠悠二

千里安得到汝旁
中宵不能寐
輾轉心憂傷

臨淮秋夜

鳴橈伐鼓漾回波
美酒千鍾開櫂歌
秦箏甫停越謳發
落日微風雙翠蛾
芳年易盡瑤華晚
白日朱顏愁不返
橫笛他鄉未忍聞
空齋獨坐成長歎

秋日寄沈無回

涼風起庭際
簾幕迴秋陰
一葉空階落
孤燈獨坐深
芙蓉思遠道
蟋蟀動愁吟
誰念閒居客
能傷遲暮心

鍾廣漢云

似高
子業

雪夜渡鎮江

江水寒猶激，方舟夜未央。
驚濤沉鐵甕，急雪下丹陽。
獨

坐親孤燭，商歌送羽觴。
白門遙在望，葭茨鬱蒼蒼。

鍾廣
漢云

似徐
昌穀

過清流關

設險何年事，登臨四望賒。
天門閒虎豹，地軸轉龍蛇。
王

氣粉榆社，風烟博浪沙。
棄繻關下客，懷古一長嗟。

鍾廣
漢云

似蔣
子雲

阻雨彭城驛寄懷李九疑禮部

乍失河陰樹難分淮泗山寒烟原上白秋葉雨中斑鄉

夢深宵斷琴聲永日間遙憐和歌客相憶渺江關

鍾廣漢云

似邊
庭實

湘江旅懷

北渚初涼夕蕭條兩岸風烟波連漢口雲樹出湘中碧

草王孫路黃陵帝子宮此時愁欲絕不待暮潮東

鍾廣漢云

似何
仲默

衡嶽半山亭遠望

五嶺宗南嶽羣峰冠祝融路從山半合亭對海門空岫

嶠豐碑蝕瀟湘極浦通冷風如可御吾欲問鴻濛

鍾廣漢云

似王
稚欽

題真空寺壁

真空寺後雙松樹曾見先皇駐蹕初三讓豈宜臨便殿
百年猶共識遺墟離筵慣聽悲歌續佛火偏存浩劫餘

高坐道人無恙在願聞第一義何如

馬任遠 一首

任遠字毅仲永年人萬曆己未進士除知葉縣
歷官戶部員外郎

抵蘇州

酒醒夢斷旅帆孤遠岸晴波戲浴鳧橋過橫塘聞犬吠
綠楊影裏是姑蘇

徐伯徵 一首

伯徵字孺臺海寧人萬曆己未進士除南陽推
官尋改教授升工部主事歷郎中出知揚州府
有資敬堂詩集

孤山

為訪幽人跡乘茲暇日遊墓門無塑鶴山寺失安榴徑
愛烟霞夕屏開水墨秋要知白太傅到此也勾留

葉憲祖一首

憲祖字美度餘姚人萬曆己未進士除新會知

縣考選左遷大理評事轉工部主事坐建魏璫
祠不肯督工削籍崇禎初起南京刑部郎中出
為湖廣按察副使歷官廣西按察使

江行

杳靄中流二水分人傳此地弔湘君南天漸隱巴陵樹
西塞猶飛夢澤雲傍晚魚龍常涌沫隔江鳧鴈自呼羣
年來已覺風波慣枕上漁榔處處聞


陸懷玉 一首

懷玉字石含平湖人萬歷己未進士授工部主
事歷員外郎中出知鎮江府遷湖廣按察副使
轉參政山東按察使福建右布政使

也園

種藥雲根已十年小園獨寤思悠然豈無幽徑通韋曲
亦有連山象輞川半砌苔衣清似水一池花石小于錢
歸來便是西疇長晚稻秋香滿社田

明詩綜卷六十六



總校官庶吉士 臣張能照

校對官庶吉士 臣嚴福

謄錄監生 臣蔣大鎔

謄錄監生 臣朱溥

欽定四庫全書薈要

集部

明詩綜卷六十七

八

詳校官編修臣汪鏞



欽定四庫全書薈要卷二萬五百四十

集部

明詩綜卷六十七

翰林院檢討朱彝尊編

穆七首

穆字和甫一字純卿岳州平江人嘉靖中舉人
初仕為國子監助教萬曆初遷刑部主事歷員
外郎抗疏論張居正奪情廷杖遣戍西寧久之
起補光祿少卿轉鴻臚寺卿再轉太僕寺卿以



都察院右僉都御史巡撫四川有終太山人集

靜志居詩話艾公與吾鄉沈純甫先生同論江陵奪情其謫戍一西一南艾公出都詩云病向西風一促裝寥寥征雁塞雲長流沙萬里無愁遠去國孤蹤信若狂楚客江魚身可葬漢臣馬革骨猶香青山到處皆吾土豈必湘南是故鄉是亦達人之言西窳之後詩律頗效空同自公而後南風多死聲矣

聞有救獲赦不果

十年不向湘江返一疏翻為萬里行隴外儘令魑魅喜日邊應有鳳皇鳴極知故態仍狂瞽須信天王自聖明

閒却綵衣誰為著塞雲邊月不勝情

甘泉塞上呈中丞侯公

青海灣頭調角聲賢王西牧欲橫行戎心縱款猶難測
斥堠無烽却不驚破膽爭傳司馬諭受降高築白狼城
腐儒未識麒麟畫只道風塵易請纓

奉和岳州張兵備

握蘭虎署為郎日意氣相看獨有君擊節幾談天下事
建旄今領水犀軍幕中說劍雙龍動樓上停雲七澤分

秋色滿湖吟眺足銀魚何苦碧山焚

寄呈乾菴馬公拜相

繡裳蒼玉自丹霄風采今看表百僚帝謂山龍惟爾補
人期霖雨幾時調鳳池魚藻歡應合鴈塞狼烟燼盡消
流落扶風門下士玉闕猶得比班超

別羅孝廉

江城傾蓋識清狂意氣翩然調更長歌罷竹枝空下里
賦成雲雨滿高唐蜀門秋盡啼猿急涪渚霜清白鴈翔

後夜思君出巫峽楚山巴月共蒼蒼

寄懷沈純甫戍金沙

衡陽那見鴈飛回庾嶺梅花幾度開
謫後沈郎應更瘦調同楚客不勝哀
金沙潮落珠光動銅柱風清海月來
君在瘴鄉偏逸興新詩能為故人裁

遼東大捷進橐駝志喜

年來渤海不揚波忽聽遼陽奏凱歌
白羽飛傳三箭捷赤囊馳獻獨峰駝
將軍絕勝嫖姚勇良馬何論大宛多

此日天聲應萬里合標銅柱白狼河

瞿汝稷一首

汝稷字元立常熟人景淳子承父廕由五府屬
歷郎署知黃州邵武辰州三府遷長蘆都轉運

使加太僕少卿致仕有同卿集

曹能始云同卿詩沿選體律絕

步趨唐人
斐然成章

送僧游五臺

欲叩三車奧還過五髻西飛雲先錫住怖鴿覓燈棲金

閣看長在珠林望不迷
天花開處處知與石林齊

屠本峻一首

本峻字田叔鄞人尚書大山子承廕官太常寺
典簿歷南禮部郎中出為兩淮運司同知移福

建運使有屠田叔詩草

詩話田叔好詼諧詩多不拘格律晚節歸田愛
客益甚盬豉蒜果觴客必盡歡守辰州日禁民
殺牛有唐生牒言家貧畜一牛不幸死請鬻其
肉田叔度其偽也判以俸錢買牛葬之牽至乃
生牛因命小吏飯之及解官衣深衣騎馬出門
州父老泣相送牽牛隨其後時人為作辰陽留

積圖年既老好學不倦或曰先生老矣奚自苦
為荅曰吾於書飢以當食渴以當飲欠伸以當
枕席愁寂以當鼓吹未嘗苦也因自稱慙先生
亦曰幽叟起生壙于甬上撰狀及表年八十餘
乃卒至今甬東言風
流儒雅輒首及之

燕歌行

登君果愚藻井之堂坐君龍鬚琥珀之牀贈君五明七
寶之扇酌君紫霞碧玉之漿烹鮮擊肥召吾客秦箏趙
瑟鳴我旁世上浮名亦徒爾安有五侯七貴能文章勸
君無言舌且藏

毛以燿
二首

以燿字允奎吳江人萬歷中舉於鄉歷官慶遠
知府進按察副使致仕有審雨齋詩橐

邨居

丘壑偏宜謝幼輿
清泉碧篠愛吾廬
祇知幽絕堪高枕
未解窮愁好著書
閒過山僧烹笋蕨
倦從野老課菑畬
夕陽流水荆扉靜
花滿清尊月滿裾

山陰王伯良久滯京師却寄

蛾眉十樣逐時新不是東鄰亦效顰况是浣紗溪上客
那能不憶浣紗人

吳詔相一首

詔相字廷承宣城人由舉人萬曆初知汝州有

吳汝州集

詩話臨川湯養仍為廷承作傳述其生而敏慧
既就塾日記千言縣試令訝其幼謂曰童子豈
外黃兒邪應聲答曰明府比中牟令矣令竦然
異之廷承嘗夢紫衣人指點一閣道中松柏蔥
青數里及知汝州果有閣道松林中歎曰命止
此邪因慵於治事未秩滿稱病瘖去歸見其母

抱持大哭失聲疾遂愈丁母憂未終喪而卒
存詩雖無幾近年編續宛雅者竟遺之惜也

同張侍御有光汎舟分韻

桂櫂連朝發松雲卓午陰涼風轉蕭瑟細雨潤衣襟
歌酒狂無奈耕畝思更深晚來餘興在不厭再相尋

費懋謙一首

懋謙字民益鉛山人襲廕官南京都察院經歷

詩話民益屨屐子弟綽有詩名蕙善山水梅竹
青溪社集實首倡之相逢一篇源出繁欽楊方

相逢行別吳中四子

與君相逢處乃在青溪濱何意溪頭柳能令傷客神與
君相逢處乃在邀笛閣何意笛中曲能令心不樂與君
相逢處乃在射堂上何意堂前月勞勞生夢想與君相
逢處乃在冶城宮何意冶中劍飛躍各西東我昔承清
盼君亦憐我姿願以朱絲絃報君青桐枝終日不成縷
對君空自持願以江干菝報君蘭蕙芳終日不成劑對
君空自將願以青玉盃報君金琅玕終日不成琢對君
倚長歎願以錦繡段報君貂襜褕終日不成章對君長

煩紆贈君愛流晷我亦慎區區所貴各努力聚散誰能
無中情既款款徒倚亦何須古人皓首言君諒我不殊

王敬臣 三首

敬臣字以道長洲人參政庭子講學於吳以薦
授國子監博士學者稱少湖先生有俟後編附

詩

詩話博士講學不立異同以躬行為本
詩其餘事務去擊壤陳言更難得也

古詩送陳憲副雨泉之任滇南

黃鵠翔四海潛虯樂泥蟠飛沉各異塗言就性所安公
行越萬里予留守故灘公勵王尊節九折驅無難子含
令伯誠有懷良未殫俱奮古人心咸思效寸丹臨岐申
贈言睽離何足歎相期慎明德歲晚同金蘭

感興 二首

河伯侈秋水囂囂自矜誇一聞海若言頽然喪其多覆
載會有終百年能幾何營營靡朝夕所得皆塵沙哀哉
復哀哉是不可已邪

月圓還復缺缺矣又重圓圓缺相倚伏造化良自然萬
事皆如此孰能測其端君子通大道曠然釋嬰纏寸心
良已罄付之蒼旻天

莫是龍

六首

是龍字雲卿以字行更字廷韓松江華亭人如
忠子以諸生久次貢入國學有莫廷韓遺橐

唐君

公云廷韓夙成捷悟
不屑為沉深之思

詩話廷韓少謂王道思於閩道思贈以詩云畫
舫夜吟令客駐練裘畫卧有人書然詩篇書法

皆不見出羣
五律稍勝

登潤州城樓

高閣俯城陰
松篁一徑深
晴雲搖海色
夕梵起潮音
古戍關門斷
山程驛道侵
江流無日夜
南望是鄉心

過滕縣

邑傳滕子舊爵序
薛侯先壤地
雖褊小君臣自井田禮
猶宗國秉館想上宮
連遺恨千年事何勞授楚塵

送俞生之金陵

驅馬向斜日秣陵尋舊游
人應草堂在月滿大江流
春燕投新社離鴻失故洲
看君留別意不減落花愁

送陸生遊燕

小陸江東俊名先入洛
聞猶能藉知己未可怨離羣
燕地春邊雪吳天野外雲
翩翩徒羨爾西笑立斜曛

宿河口酒家

笑指停橈處烟荒一水斜
邨旗招野客岸火認漁家
淡月微侵幕初潮淺映沙
海天應不遠吾欲訪靈槎

贈任城故知

此別何疎闊風烟宛昔游馬頭芳草路柳外木蘭舟
易隔三年夢難期十日留任城今夜月閒殺酒人樓

鄔佐卿一首

佐卿字汝翼丹徒人有纏頭集

西津別妓

立馬江皋問暮潮片帆西上路迢迢人歸碧草離亭遠
賦罷青山夢雨消雲影飄零桃葉渡月華淒斷鳳皇簫

壚頭濁酒春堪醉
還訪秦淮舊板橋

甯祖武 二首

祖武字仲先吳江人以貢生官肇慶通判有迂

公詩草

詩話別駕未晚投簪娛情泉石預營蘭室自為
之銘號曰迂丘嘗欲買木版以覆廡几思送死
棺所必需匠人告以元日往購則木商不計值
且有酒果相邀別駕遂以是日就肆飲酒齏果
而回鋸木以覆几焉題詩云元日治凶具人情
良獨難生以覆几廡死伴歸空山是亦達人之
高致矣別駕詩多率易
錄其二首知非真迂者

新安夜泊

芳草綠如此征塗尚未窮
隔江商店火近市酒旗風
人語邨邨異溪聲處處同
不須愁落魄人世總飄蓬

吳江竹枝詞

唐家坊藕太湖瓜消暑冰肌透
碧紗水上納涼何處好
垂虹亭子看荷花

陶允嘉 三首

允嘉字幼美會稽人承父大順廕官鳳陽通判

有澤農吟

詩話幼美體弱然無塵坐之氣符離懷古一篇惜不令淳熙諸君子見之

廣陵詞

桃花新雨後載月出邗溝東板江南曲筠簾撐子舟飛
飛雙燕子何處覓迷樓

符離懷古

張都護殺曲端關中將士皆心寒秦丞相殺岳飛萬里
長城一旦隳洛索歡顏烏珠喜小朝廷復何恃長脚太

師吾何尤魏公九原知悔不

高邨謁漢高皇廟

高邨湯沐地下馬獨徘徊落日吹原廟歌風想舊臺新
豐雞犬去故土夢魂來猛士空煩憶韓彭安在哉

黃繼立一首

繼立字志學江陰人貢入太學官中書舍人

初夏

楊花初點渡頭萍十姊妹花紅滿屏門前忽見漁舟過

風送鷓鴣一陣腥

任山甫一首

山甫字夢榛休寧人自號五安山人承天府經歷遷德安通判

和費民益韻

萬里事行役經年往復還愁多生白髮病久改朱顏不厭沽新釀長思返舊山因君歎留滯牕外雨潺潺

襲勗一首

昂字懋卿章丘人以歲貢生官江都訓導轉威
縣教諭再遷開平衛教授有龔懋卿集

詩話懋卿少貧牧羊豕山中手書卷不釋既而
小吏誣其逋租受笞益發憤力學見李中麓以
詞曲名恥之銳意學古
文辭時稱為醇謹君子

立秋

烟雲黯慘仲宣樓荏苒年華逝水流白首鄉山千里外
滿城風雨又新秋

黃時二首

時休寧人縣丞有順堂集

白螺山吳大帝廟

螺山何嵯峨荆江走其下上有紫髯祠祈報滿邨社自
昔割據時炎劉失區夏聿求土宇寧遑恤名號假巴蜀
徵讖符許洛盛戎馬於焉割朱方鼎立足相亞虎既負
其隅龍乃戰于野哀哉爾汝歌誰永霸圖者來游陳我
辭渚蘋薦盈把

孟嘗君養士處

官橋垂柳嬾闌干古薛遺墟駐馬看
食客三千容易散
至今惟說一馮驩

李德繼

德繼字子同鄞縣人由太學生選授光祿署丞
有借樹齋集

懷包參軍

極目西來山色秋但聞長笛不勝愁
故人家在清江上
潮滿門前月滿樓

劉成美一首

成美字大卿漢陽人萬曆中舉於鄉由河源知縣歷官蘇州府同知有閒閒草

南還道中

春去花齊落人歸路轉賒峰陰昏霧合樹影夕陽斜溪
隔循紆徑橋危度淺沙停驂聊對酒醉處即為家

卞洪勳一首

洪勳字世甫嘉善人司勳錫子官東鄉主簿有

漱石居集

歲暮述懷

戶外塵非隔庭前草不除
技方慚畫虎賦已就枯魚燈
影隨風蕩鐘聲帶雨踈
半生無別嗜惟讀父遺書

田藝衡

一首

藝衡字子執錢唐人汝成子以歲貢為休寧教諭有留青日札

月夜即席示座客

雲散江城玉漏遙
月華浮動可憐宵
停歌不飲君何待

試問當年李玉簫

自注玉簫蜀宮人愛唱王衍宮詞月華如水浸宮殿有酒不醉真癡人之

句

謝三秀 十三首

三秀字君采貴竹人萬厯間學官有雪鴻集

李本

寧云君采詩觸境生情緣情體物格整而不滯氣雄而不亢旨深而不晦致清而不薄辭麗而

不浮此治世遺音也 陳伯璣云君采造語渾成即偶入纖詞不失大雅

詩話君采詩甚清穩由其生於天末習染全無此駢人之軼倫超羣者

城南江亭

旦發虹梁門暝投漁磯
路春水半篙綠褰裳不可渡
溪深烟復深遥遥辨庭樹

晚汎蕭湖尋宋人虞仲房石壁

川光鬱初霽野航恰受客
天空斷鴈哀水落寒沙積
絕峽響飛泉飄颻足練白
涼葉不禁霜楓林還槭槭
輟櫂湖之陰突兀見瑤碧
恍疑太始雪拔地起百尺
登眺極人目了了晰阡陌
胡為水窮處乃有此竒石
昔聞避地

者於焉卜其宅愛茲雲木秀重以巖潭僻靡旦匪蘭橈
或時仍拓屐遺詠蝕苔紋風流已陳迹高躅杳難攀我
來徒惋惜商飈增暮寒旨酒若為適興盡鼓柁歸滄浪
黯將夕

蠻娃曲

蠻娃出戶筠筐隨琇子穿環帕裏頤東鄰女伴競相逐
四月深山采葛時葛葉萋萋葛藤綠按葛為絲給春服
經絲易脆緯絲柔裂指猶嫌緝不速破牕風急寒地生

流黃軋軋無停聲織成未敢問刀尺明日輸租應到城
到城杼軸歸公府吁嗟蠻娃亦良苦君不見北里春風
歌舞人曲罷羅裳棄如土

湯陰道上見楊花如繡戲作

古道多垂楊春殘花亦白
毵毵隨晚風到地忽盈尺
中原凋敝民力微安得吹上流黃機
若教織作機中素九月何人不授衣

安莊夜聞警

鞞鼓中宵急愁聞戰伐頻數家出煨燼一郡入荆榛地
亂難為客塗窮恥傍人披衣待明發華髮鏡中新

邨行即事

十里荒邨路尋幽到薜蘿陂寒菰葉少籬晚豆花多廢
寺紛蟲網貧家靜雀羅老翁晞髮坐相對說兵戈

送吳使君攝八番郡事

才子漂零久今看治郡功地當三楚盡山到八番雄詞
賦霜毫裏桑麻露冕中孤城饒吏隱解帶聽松風

夜集薛葵軒明府西巖

曲磴穿叢篠風煙憶武陵
飲能齊阮籍嘯或似孫登投
轄留山客呼船送嶽僧
江城無堠火薄暮見漁燈

焦溪雨渡

遠岸平蕪綠寒流似若邪
雨深人喚渡春老客思家
野葛牽青蔓溪藤落紫花
浮名是何物漂泊又天涯

辰陽晚泊

春流似建瓴春色晚冥冥
溪菜盤餐滑江魚匕箸腥
月

來沙漸白煙斂樹猶青漁父方舟處聞歌媿獨醒

洞庭夜泊石門對月

平湖涵霽景涼月漾晴暉樹極長天盡雲歸別島微燈
前秋社燕夢裏故山薇誰念滄洲客飄零未授衣

西菴徑中萬竹脩然喜而賦此

負杖入深竹一盤仍一盤鄰僧分路去野客到門看不
雨夜尤綠無風夏亦寒素琴多遠思宜對此君彈

題趙文度畫西溪梅花

欲雪不雪天淒淒南枝北枝開漸齊因訪梅花過橋去
始知春在西溪西

王象艮 二首

象艮字思止濟南新城人仕為姚安府同知有

迂園詩集

董思白云思止風華秀絕骨力沉鬱
錯出大歷長慶之間 公孝與云思

止春容淹雅白真

韋澹自然神合

豫讓橋

義士負奇節所重在知己讓也慷慨流恩仇惟一七將

以酬智伯勢必危襄子一往志不返肯以彼易此所重者一言所輕者一死荒橋至今在過者猶興起立馬對斜陽湯湯聽汾水

雨中登鹿角山宿趙荆石宅

厓古憑空閣峻嶒石徑斑龍源花外水鹿角雨中山幸有心知共兼逢地主間登臨無限意信宿不知還

徐成一首

成字竟之金華人仕為鎮國將軍

洞庭謁湘君廟

帝輦南巡竟不還，亂雲愁絕九疑山。
空憐湘水通三楚，遙想蒼梧近百蠻。
墮淚有痕留竹上，落花無夢返人間。
千秋哀怨存遺廟，悵望蘭旌不可攀。

吳稼登 七首

稼登字翁晉，孝豐人。維嶽子。以例除南光祿典簿，累遷雲南通判。有玄蓋副草，又北征南諧滇

游諸稟

詩話翁晉樂府如健兒騎駿馬左右馳突靡不
如意近體頗合西崑歸自滇南里居極絲竹雲
林之趣自號大滌先生病革語其子以布衣幅
巾敘謂如此庶足以見疇昔詩人於地下蓋以
皆郎自
懲云

礦山謠

朝采金暮采金草枯山根裂居民淚沾襟
狺狺之犬昔以吠夜今以給傳舍
喔喔之雞昔以司晨今以飽游民
水衡積錢爛如土何不詔取中官歸御府

牆頭草

牆頭草秋零春復抽胡不生彼庭中生牆頭庭中無不
可惡木枝蔭我又豈無野田媵農夫二三月荷鋤將見
凌牆上趨難為階託根高固其芟牛羊欲食不得食牧
豎過之徒歎息

歲晏偶成

歲云暮矣風淒然豆萁零落南山田疎篁掩映半庭雪
獨鳥棲息中林煙溪上老翁索魚價壚頭女兒催酒錢
衡門暫啓一失笑復有僧雛來募緣

秋懷二首

金荆為枕紫荊牀，已共秋塵委曲房。
燈下有情啼絡緯，機中無夢到鴛鴦。
明星爛爛愁天老，爝火離離歎夜長。
一樹桐花零落盡，可憐梧子自經霜。

重扃落葉迴相依，羅袂無聲事已非。
寶鏡欲開鸞自泣，玉釵初斷燕猶飛。
旅葵未合生空井，苦槩真堪染故衣。
滿目清秋何所似，白雲愁色遠微微。

社日過山莊

背依叢竹面清溪茅屋蕭疎類瀼西兒子社錢無用覓
田家秋釀且相攜梁間已去將雛燕階下新行傍母雞
一束荆薪蕪蘊火不愁山路夜歸迷

金陵酒肆贈茅平仲

暮年看爾壯心孤落落酣歌擊唾壺但數一錢憐姹女
纔誇千騎笑羅敷梨花雨濕紅襟燕楊柳春藏白項烏
欲向盧家借雙槳莫愁不是舊時湖

薛文炳二首

文炳字有孚嘉興人鴻臚署丞有調疴集

江城登望

三月清明近風光動客愁
葉齊江柳暗雲暝石塘幽
戰伐悲新鬼登臨憶故丘
南湖春欲暮羈思羨鳧鷗

閒居雜興

最愛江南小滿天
櫻桃爛熟海魚鮮
一聲布穀啼殘雨
松影半簾山日懸

王同軌一首

同軌字行父黃岡人以貢生知江寧縣

行山中

雨餘林氣靜山晚日光斜野店依孤樹邨橋卧斷槎馬
嘶遙澗水犬吠隔林花白首鉏雲者春風自一家

華善繼 三首

善繼字孟達無錫人仕為浙江布政司都事遷
永昌通判有折腰漫草

詩話五達詩
不及其弟

舟中述懷

高城片雨外倚櫂亂蟬鳴
遠樹他鄉色浮雲過客情
泉甘知早竭木散得長生悔
逐時人後空將骨肉輕

雨後

高樹留殘雨層城帶晚煙
厨香菰米熟架滿豆花鮮
未改狂奴態還為長吏憐
不因公事暇那賦白雲篇

春盡

即看春欲盡漸覺客衣輕
燕以飛蟲下魚因落絮
驚看

雲忘拙宦對雨憶躬耕最愛新移竹清風葉葉生

華善述 十六首

善述字仲達無錫布衣有被褐先生詩藁

王元美云

仲達詩翩翩霞舉或艱或易忽沉忽揚瑕瑜互見大槩不可為典要

詩話仲達與兄善繼孟達竝有才名王元美列其兄於四子之列而仲達不與焉觀其詩品矜竒灑落幾欲御風而行一時詞客末或過之而元美序之謂不可為典要是亦拘牽之論已

長相思

長相思相思長幾許黃河三三曲曲通牛渚巫山六

六峰峰峰度神女枯槎不來雲不雨夢落風波安可語
休洗紅

休洗紅洗紅紅可惜初洗猶作黃再洗漸成白紅芳既
去質亦移雖有茜草將安施

海樓篇

上客且歸休我歌送行舟君家近東海海中有瀛洲瀛
洲不可見但見金銀樓此樓誰為之無乃蜃氣浮相望
邈無梁引領成悲愁

濠梁篇

濠水清若虛，儵魚此中居。
儵魚何所樂，水濶忘呶濡。
莊惠去已久，懷古思有餘。
子是梁上人，非魚諒知魚。

雜詩

白髮白更長，白花白更香。
春風一相見，歲月久難忘。
君耕石田熟，余亦起羣羊。

山中作

達士貴薄游，幽人安坦步。
耿耿梧月初，蕭蕭竹風暮。
握

蘭青厓陰采蘋寒水渡荷衣秋始製何用畏多露

答錢化臣

淒蟬餐清風長日鳴茂林蟋蟀飲繁露永夜莎根吟二
蟲夫何知聽者多苦心絃桐與無絃視之誰非琴曰余
室湖渚開口當遙岑既無簪組累又鮮轅馬臨終歲足
暇豫長謠散幽襟偶為好事傳詎取時名侵媿君錫嘉
譽撫已安可任

重送世叔

清樽可續沽孤舟且緩發款款垂別語皎皎初圓月幸
自合一心無令歎華髮

庭草作花有感

中庭無嘉植青碧翳芳草秋至花亂開翠色亦自好既
不藉溉灌復無採摘擾無名且無種生意可常保

今夕行

今夕何夕露為霜湖中之水寒且蒼明月倒落水中央
溯游從之葭莢香雲山層層思難忘我有故人隔他方

三年不歸松菊荒誰謂河廣一葦杭爾獨胡為勞我腸
湖中之水歌

湖中之水常東流眼前無事不可愁貴如博陸死夷族
富如衛尉生斷頭勲如淮陰竟菹醢親如文信俄仇讎
唯有文章稱不朽高名往往垂千秋試尋名下人安在
左馬屈宋空土丘不朽者文朽者骨寸心枉作蛛絲抽
自古多才更多累我獨何為生煩憂

招隱吟和伯氏

招隱吟
寒山蒼蒼日欲沉
風來萬木皆蕭森
飛泉激石流清音
聽之如玉復如金
須臾月出罔兩侵
猿鳴後林鶴前林
青松白露光淫淫
珠璣墮地不可尋
有美一人薜荔襟
橫陳古昔三尺琴
一指未下意已深
廣陵之散愁人心
抵節高歌招隱吟

蟠桃思

蟠桃開花予共汝
十日瑤池白雲語
蟠桃結子汝棄予
萬里澤國紅塵居
等閒便擲三千歲
相憶那無一字書

旅懷

萬里秋將盡孤舟夜未殘
獨愁成淚易清夢欲歸難
鴈落繁霜白鷗飛片月寒
朝來行客鬢映水默相看

晚秋鄒靈壽見過

野田猶汎濫籬落亦荒蕪
啓戶聞鳴鵲停舟散浴鳧
愁來說鴻寶酒後憶雕胡
君定知朝事今年可賜租

寫懷

薄俗空相苦寒泉只自甘
鶴應知夜半狙不喜朝三北

斗懸牕北南山橫舍南從教斷來往端坐待鸞驂

梅守箕 九首

守箕字季豹宣城縣學生有居諸前後集

詩話梅氏一門羣從禹金最負時名嘗後先過
王元美元美贈之詩云從誇荆地人人玉不及
梅家樹樹花季豹為禹金從父譽雖稍遜
禹金然詠懷諸作恐小阮亦當避席也

招隱曲寄吳允兆

勝游不擇塗山棲不避幽魚鳥有本性何以異沉浮昔
者東方生金門可優游亦有嚴君平足跡謝帝州真情

愛松桂同器忌薰蕕輪轂淹泥淖樽俎潛戈矛流塵眩
目光魑魅走道周舍旃盍言旋春草盈芳洲

詠懷 三首

飛閣臨馳道櫺軒俯四隅遠望可當歸何以心不娛夾
巷叢灌莽第宅成丘墟魑魅嘯中林夜啼猿與烏密親
不我與我友不我俱拊劒明所懷託情於素書

愛極翻自疑驩極易以悲所以樂莫樂固在新相知皎
皎中天月虧盈尚有時惠思念疇昔怛無好懷歲暮

空堂上明星照我扉身各天一隅安知渴與飢慰我同
心人膠漆未可期

索處無適懷羣居興怨尤素交夙已盡鬪鬪起相仇甘
醴善逆人終始寧為謀同心託蕭艾一器戒薰蕕匿怨
而友人見鄙於左丘信哉朱穆言獲我心所求

雜感

獨坐不能寐振衣將遠行悲風自南來吹我榛與荆河
水何泱泱中有好鳥鳴我欲往從之惜哉已徂征白日

難少留年歲忽已傾願借明月暉流光燭我形

古詩 二首

日月易流邁哀榮曾何期霜霰忽來集衆芳忽已辭物
象貴其新故心誰當持懷念如夙昔中情苦不怡人生
一世間離合亦有時超忽即變化展轉焉可知

郭東亦有墳郭西亦有墳登城一以望纍纍正相因狐
兔穿為巢魑魅託為鄰潛燐不自照幽路何由伸陰風
卷秋草日莫常悲辛

送吳允兆

秋氣何寥溼，廓處羈旅間。
淹留蹇無成，惆悵私自憐。
駕車出行游，願從吾所驩。
所驩良已篤，情好若蕙蘭。
素風飄廣路，枝葉忽以殘。
結誠殊匪薄，永久思弗讐。
叙意衷所期，令德思勉旃。

贈祁羨仲

有序

羨仲俠士能，詘伸好奇筴。
少游豫章乏食，即行乞市中。

客游小四海不裹千里糧城中乞食已忽醉胡姬旁縱
橫狹路間褐夫視侯王吁嗟不逢時蓬累職所當

梅鼎祚 七首

鼎祚字禹金宣城人國子監生有鹿裘石室集

歐楨伯云禹金五言古蒼然骨立七言馳驟樂
府時極杜陵之致近體氣純而完聲鏗以平思
麗而雅 王仲房云禹金詩確守風格乖僻不
生竒宕時作 沈君典云梅叔子天才駿發詩
如王子晉來縱
嶺清吹冷然

詩話禹金周見洽聞著書甚富詩乘文紀之外
旁及書記小說兼精傳奇所填韓君平王合記

為詞家所賞有云風中絮陌上塵歎
韶光何曾戀人亡友王介人極稱之

雜詩

智愚無常稱妍媸無定容名德貴易立顰笑賤難工登
高疾赴響所處固已崇流俗快目前安得察其終

雜感

忽忽中不憚駕言陟高丘高丘臨四野湛湛長江流豈
不懷所歡欲濟無輕舟佳期曠何許歲月倏已邁蹟往
既非故撫來難豫謀俛仰千秋間涕下不能收

雜懷

鷓鴣厲其羽元鳥歸故鄉日夕涼森發大火戢朱光陰
氣馴以至草木率焜黃九六代為窮龍戰血縱橫堅冰
自有時聖人戒履霜

哭麻鴻臚

驚風下平楚白日歸虞淵彼此相代謝時至有固然所
以上知士往往不待年比歲在龍蛇汝命竟不延詎意
黃公壚倏忽成河山逝水豈顧反行雲何當還形神曠

不接而况尋笑言先後等斯須喟焉摧心肝

金陵寄王仲房

宛水一為別金陵再寄書王家桃葉渡秋日柳條疎客
久少知己吾將歸敝廬向君尋舊約百里共樵漁

金陵客懷

乙酉暮
秋作

恣意游能數多懷望轉迷清秋雙闕外佳氣二陵西鴈
已先霜下烏仍近夜啼都亭酒太惡不得醉如泥

九月八日城東樓晚眺寄史使君姑孰

落葉來鴻秋可憐孤城晚眺正蒼然
向傳李白題詩處重見元暉在
郡年霜後鳴磬千戶月風前
哀笛一江煙倚闌却憶龍山會
誰共黃花插酒邊

梅蕃祚 一首

蕃祚字子馬宣城人鼎祚從弟官寧鄉主簿有
涉江草王程草

詩話子馬與季豹禹金同負詩名王元美詩較
他羣從更高華蓋指子馬言也然非季父賢兄
之比

重過道甫叔山居

谷口子真宅松蘿境自偏
當牕懸衆壑隔樹見飛泉
送客柴門下尋僧野寺邊
時時來取醉人道竹林賢

汪道貫三首

道貫字仲淹休寧人道昆弟有汪仲淹集

李本寧云

仲淹詩頗頡頏其兄才情
節奏出入陶韋王孟間

贈鄧孝孺

聞汝幽棲處澄湖一片明
青衿生事拙白髮著書成
澤

國堪高卧山田足耦耕華陽仙路近千古傍茅盈

鄉榜被放作

得路難如此飄零似去年曉風池上月秋水鏡中天
咄咄悲生事勞勞問酒錢啼猿與征鴈總使淚潸然

題扇

落日照前溪倒影映紅樹幽人不出山白雲自來去

汪道會一首

道會字仲嘉休寧人亦道昆弟諸生有小山樓

橐

李本寧云仲嘉秀色天然盡去雕飾

過王百穀

秣陵三月柳含煙猶憶城南送酒錢
雙槳暮潮桃葉渡
一尊寒食杏花天
江門隔歲書相問
吳苑今宵月再圓
執手莫須論往事
傷心近廢鵲鴿篇

劉

潤一首

潤字德祖歙縣人有鶴嶼集

寄王仲房

不見風流王右軍詩名湖海日相聞歸期漫阻黃梅雨
鄉思遙懸白岳雲千里音書秋後斷一江南北夢中分
潭園草罷閒居賦誰共清尊醉夕醺

劉 澳 一首

澳字本瞻潤弟

九日同葉茂長汪和叔登高燕集

九日他鄉菊未開相逢同上竹西臺江南木落千峯出
薊北風高一鴈回笑指青山懷杖履羞看白髮會歸來

明年此日難同賞
烟雨何妨數舉杯

吳元樂 三首

元樂字振之休寧人

春日有懷仲仁

獨行墟落間
舊徑生芳草
一見蝴蝶飛
三歎青春好
故人不可同
能無傷遠道

八月十二夜作

暝鐘初定後
秋氣漸深時
顧此蒼苔上
泠然白露滋
蛩

還依砌響月自隔林移不見素心者空懷夙昔期

湖上憶別

河橋三月水平津兩岸輕波漾綠蘋曾向此中傷遠別
故人今隔幾回春

產科一首

科字闕

望江人由貢生萬歷中知通江縣事

茗山洞

羅隱曾隱此山有蓮花
峯相傳仙人嘗憩其頂

峰陰迴合擁青蓮詞客遺蹤尚儼然啼鳥故疑歌白雪

飛泉猶似奏朱絃
林扉蕭瑟無塵躅
石室逢迎有洞仙
安得向平婚嫁畢
拂衣吾亦弄雲烟

明詩綜卷六十七